

Christi, qui est ipsa sapientia, corriget aut emendabit? & nonne quod sic ordinatum, atque a Spiritu S. per Paulum repetitum est ad nostram salutem, praevaleret ei, quod nobis est visum aliter? Adeone & Ecclesiae Collectio plane deserenda, quoties verbum Dei est audiendum, quam tamen Apostolus commendat & urget Hebr. X. 25? Quod si enim in usurpando Sacramentum solitudo, vel congregatio minor ad devotionem magis conducit, cur nec idem in audiendo verbum valeret? Corruat sic publicus Dei cultus oportet, necessumque erit, ut coetus in conventicula dissolvatur, in quorum alio praevaleat Apollo, Petrus in alio, in alio Paulus. Quale quid novum Corinthiorum schisma esset a Paulo reprehensum 1. Cor. 3. 4. Adde: Quid devotio aliud est, quam fidei exercitium, cujus in usu Eucharistiae proximum objectum est universale Christi meritum, ad quod quilibet homo, quisquis sit, per fidem accessum habeat, cujus signum ac arrhabo sit hoc sacramentum, scilicet Christum se pro omnibus, applicative etiam, quotquot manducant, in mortem dedisse, & suum sanguinem pro omnibus, quotquot hic bibunt, in ara crucis profudisse. Quae ergo major exsuscitatio devotionis esse potest, quam si quis in frequentiori coetu secum expendat, stare se hic in communionem gratiae cum multis, sed communionem gloriae cum adhuc pluribus esse expectandam, item coram DEO in participanda sua gratia nullum hic esse hominum discrimen, sive quis dives, sive pauper sit, modo credat, indeque Deo suo pro tam universali gratia, & Christo Redemptori suo pro Universalitate sui meriti gratias agat, firmiterque constituat, se propter Deum & Christum nunc quoque proximum, tanquam cohæredem aeternae & gratiae & gloriae, diligere velle. Haec vera devotio circa Eucharistiam, cui coetus copiosus non obest, sed prodest. Dicis, in frequentiori coetu comperiri multa obstacula, quibus mens distrahatur. Sed quis est vel ex vilissimis, qui dicere hoc non possit? Et nonne idem in solitudine fieri potest, ut, priusquam Orationem Dominicam quis absolvat, agnoscat animum aliquoties ita fuisse distractum, ut recollectione opus fuerit? Orandus est hic Deus, ut per Spiritum S. cogitationes nostras dirigat in hujus tam sacro-sancti Mysterii fervidam contemplationem, obstacula a nobis revocet, mentemque nostram exsuscitet, ut attendat
piis